



INATSISARTUT

Aningaasaqarnermut Naligiissitaanermullu Naalakkersuisoq

Ulloq: 6. marts 2023
J.nr.: 01.31.06/23-01021

Aningaasaqarnermut Akileraartarnermullu Ataatsimiititaliap marlungornermi ulloq 21. februar 2023-mi aalajangiineranik Naalakkersuisunut ilisimatitsineq.

Pisortanit ikiorsiissutit aamma suliffissarsiortunut ikiorsiissutit pillugit IT-atortulersuutit nutaat atugassanngortinneqarnerat. Ataatsimiititaliap suliaa nr. 01.31.06/22-001021 **ISERTUUSSASSAQ TUAVIORTOQ**

”Naalakkersuisut inassutigaaat,

- Konto pingaarnermi 80.00.01-imi, nuussinissamut sillimmatinut tunngasumi, aningaasaliissutit 2023-mi 6,1 mio. kr.-inik ikilineqassasut, aamma
- Konto pingaarnermi 82.20.03-mi, isumaginninnermut tunngatillugu IT-atortulersuutitut tunngasumi suliaasaq nr. 40.094-imut, pisortanit ikiorsiissutitut aamma suliffissarsiortunut ikiorsiissutitut tunngasumi, aningaasaliissutit 2023-mi taakku amerlaqataannik 6,1 mio. kr.-inik amerlineqassasut”

Aningaasaqarnermut Akileraartarnermullu Ataatsimiititaliap oqaaseqaatai apeqqutaalu:

Inassuteqaatit nutartikkat siuliani allasimasut pillugit ataatsimiititaliap Naalakkersuisut qujaffigai. Kiisalu ataatsimiititaliap aalajangiinnerminik allakkiaanut, suliamut siullermut ataatsimiititaliap suliaanut nr. 01.31.06/22-1006-imut tunngasumut, 24. januarimeersumut Naalakkersuisut 27. januar akissutaat ataatsimiititaliamit qujassutigineqarpoq.

Aalajangiinnerminik allakkiami siuliani taaneqartumi ataatsimiititaliamit allanneqartutut siunertamut matumani pineqartutut ittumut aningaasaliinissamik pisariaqartitsineq ataatsimiititaliamit paasilluarneqarsinnaavoq. Ilassutitut aningaasaliissuteqarnissamik qinnuteqaatinik suliarinninnermi aningaasaliisarnermi tunngaviit inatsisitigut aalajangersakkat ataatsimiititaliamit isiginiarneqarlutillu malinneqartarput. Pisariaqalissappat amigaataajunnartut iluarsineqarnissaat ataatsimiititaliap soqutigisaraa. Piffissakilliorneq aningaasaliisarnermi tunngaviit tunngaviusut saneqqunneqarnissaannut tunngaviusinnaasutut ataatsimiititaliamit isigineqanngilaq.

Ataatsimiititaliap 24. januar 2023-mi allakkiaa naapertorlugu sanaartornermut suliaasaqarfimmi ilassutitut aningaasaliissuteqarnissamik qinnuteqaatinik nassiuissarnermi periutsit nalinginnaasut malillugit suliaasaq matuma akuerisinnaanera iluarisimaarneqarmat ataatsimiititaliamit oqaatigineqassaaq. Kiisalu Majoriamut aningaasaliissutit imaluunniit nuttarnersitsiniarluni aningaasaliissutit ikilineqarnerisigut pinnani, nuussinissamullu sillimmatit ikilineqarnerisigut aningaasaliussassat aningaasalersorneqarsinnaanerat ataatsimiititaliamit iluarisimaarneqarpoq.

Apeqqut 1:

IT-mut atortulersuutit ingerlaavartumik ineriartortinneqarsimasut aammalu suliniummi aqutsisut 2023-ip aallartinnerani allannngorsimanerat ataatsimiititaliamit maluginiarneqarpoq.

IT-mut atortulersuutip nutaap suliarineqarnera killiffialu erseqqinnerusumik ilisaritillugit saqqummiussinissamik Naalakkersuisut, suliap matuma akuerineqarneranut atatillugu ataatsimiititaliamit qinnuigineqarput. Tassunga nangissutitut pisortat ataatsimoorullugit IT-mut atortulersuutaat anginerit suut qanorlu atorneqarnerat sukumiisumik saqqummiunneqassasoq ataatsimiititaliamit kissaatigineqarpoq. Tamanna taakku siunertanut qanoq ittunut atorneqarnerannut aammalu qanoq annertutiginerannut atuuppoq. Saqqummiussineq 10 marsip kingorna ingerlanneqassasoq ataatsimiititaliamit siunnersuutigineqarpoq.

Siuliani allassimasunut Naalakkersuisut oqaaseqaatissaat ataatsimiititaliamit qilanaarineqarpoq.

Apeqqut 2:

Suliamik matuminnga saqqummiussineq piareersaanerlu pitsaanerpaasimangitsoq ataatsimiititaliamit oqaatigineqarnikuuvoq. Aamma taamaassorinarpoq suliap ingerlanerani ataatsimiititaliap Naalakkersuisullu akornanni allaqatigiinneq eqqarsaatigalugu.

Aningaasaqarnermut Ataatsimiititaliap apeqqutiminut akissummik ilaannakortumik tigusaqarnini aalajangiineq pillugu 24. januar 2023-mi allakkamini Naalakkersuisunut eqqaasitsissutigaa. Taamaattumillu tamakkiisumik akissuteqartoqarnissaa ataatsimiititaliamit qinnutigineqarpoq. Allakkatigut 27. januar 2023-meersutigut Isumaginninnermut, Suliffeqarnermut Nunamullu Namminermut Naalakkersuisoq allappoq akissutit 29. december 2022-mi ataatsimiititaliamut nassiunneqarsimasut nassiateqqinneqartut. Ataatsimiititaliamit eqqumaffigeqquneqassaaq akissut taaneqartoq Naalakkersuisumit suliassaqaarfimmu akisussaasuusumit atsiorneqarsimangimmat. Kiisalu akissut tiguneqarmat ulloq sioqqullugu Aningaasaqarnermut Naligiissitaanermullu Naalakkersuisoqarfimmu nassiunneqarsimasoq suliassaqaarfimmu Naalakkersuisoqarfiup paasissutissiissutigaa. Akissulli Aningaasaqarnermut Naligiissitaanermullu Naalakkersuisumit ataatsimiititaliamut ingerlateqqinneqanngilaq. Akerlianilli Aningaasaqarnermut Naligiissitaanermullu Naalakkersuisumit akissuteqaatit allakkiaq ataatsimiititaliamit ulloq taanna, 29. december 2022-mi, tiguneqarpoq. Tassani paasissutissiissutigineqarpoq ataatsimiititaliap ulloq 22. december 2022-mi allagaa naapertorlugu akissuteqaatissaq Isumaginninnermut, Suliffeqarnermut Nunamullu Namminermut Naalakkersuisoqarfimmu suliarineqartoq. Kiisalu paasissutissiissutigineqarluni tamanna ukioq nutaami sapinngisamik piaarnerpaamik uterfigineqassasoq. Taama paasissutissiineq tunngavigalugu inerniliunneqaannarsinnaasimavoq akissuteqaat siuliani taaneqartoq, Aningaasaqarnermut Naalakkersuisoqarfimmu nassiussimallugu Isumaginninnermut, Suliffeqarnermut Nunamullu Namminermut Naalakkersuisoqarfiup paasissutissiissutigisaa, aatsaat ukiumi nutaami pisortatigoortumik nassiunneqarumaartoq. Taama paasissutissiineq ataatsimiititaliamut ima kinguneqarpoq; suliame piumasaqaatit aningaasaliisarnermi tunngavinnik eqqortitsiunnaartut.

Ilassutitut aningaasaliissuteqarnissamik suliassat pillugit ataatsimiititaliap Naalakkersuisullu akornanni allaqatigiinneq Aningaasaqarnermut Naligiissitaanermullu Naalakkersuisup ataatsimiititaliallu akornanni pisarnissaa aqqissuussinertut pitsaasutut pisariaqartutullu ataatsimiititaliamit isigineqarpoq. Suliaq suliarineqarsinnaaqqullugu ataatsimiititaliamit naapertuuttutut isigineqarpat Naalakkersuisumut suliassaqaarfimmu akisuusumut ataatsimiititaliaq toqqaannartumik apeqquteqarsinnaasarpoq, taassumalu apeqqutit

allakkatigut siunersiuinikkulluunniit akisinnaavai. Naalakkersuisut iluminni suliassanik agguataarineranni akuleruttussaangineq ataatsimiititaliamit eqqumaffigineqarpoq, Naalakkersuisulli ataatsimiititaliallu akornanni attaveqatigiinnermi paatsoortoqannginnissaanut ataatsimiititaliaq peqataajumavoq.

Siuliani allassimasunut Naalakkersuisut oqaaseqaateqarnissaat ataatsimiititaliamit kissaatigineqarpoq.

Apeqqu 3:

27. januar 2023-mi akissutitut allakkaminni Naalakkersuisut ilaatigut allapput ilassutitut aningaasaliissuteqarnissamik qinnuteqaatinik isummerfiginninnissani siusinnerusukkut Aningaasaqarnermut Ataatsimiititaliaasimasup aningaasat ukiuannut tullermut kinguartissimagaa. Suliat pingasut 2010-meersut 2011-mi januarip qaammataani akuerineqartut Naalakkersuisumit immikkut taaneqarput. Taamaattumillu Naalakkersuisut paasinninnerat imaassimavoq; ilassutitut aningaasaliissuteqarnissamik qinnuteqaammik akuersissutiginninnissamut piginnaatinneqarluni suliassap suliarineqarnissaanut Aningaasaqarnermut Akileraartarnermullu Ataatsimiititaliaq periarfissaqartoq.

Tamatumunnga ataatsimiititaliamit oqaatigineqassaaq siusinnerusukkut ataatsimiititaliaasimasut sulianik ingerlatsisimanerannit ataatsimiititaliaq pituttugaangimmat aammalu aningaasaliisarnermi tunngavissanik inatsisitigut maleruagassaqarmat, ilassutitut aningaasaliissuteqarnissamik qinnuteqaatinik suliaqarnerminut atatillugu ataatsimiititaliamit isiginiarneqarlutillu malinneqartunik:

- Aningaasaliissuteqartoqaaqqartinnagu aningaasartuuteqartoqassanngilaq aamma isertitaqartoqassanngilaq.
- Ukiup aningaasaqarfiusup ingerlanerani inatsisartut sinnerlugit Inatsisartut Aningaasaqarnermut Ataatsimiititaliaat aningaasaliissutunik nutaanik allannguutinilluunniit akuersissuteqarsinnaavoq.
- Ukioq aningaasanut inatsiseqarfiusoq 1. januarimiit 31. decembarip tungaanut sivisussuseqarpoq.

Illassutitut aningaasaliissuteqarnissamik qinnuteqaatinik siunissami nassiussisarnissami aningaasaliisarnermik tunngaviit siuliani taaneqartut Naalakkersuisunit malinneqalersaarnersut paasissutissiissutigineqassasoq ataatsimiititaliamit kissaatigineqarpoq.

Ataatsimiititaliap paasinninnera malillugu ilassutitut aningaasaliissuteqarnissamik qinnuteqaatinik piareersaanermi, suliassat pitsaassusiannik qulakkeerinninnermi kiisalu Naalakkersuisut ataatsimiititaliallu akornanni allaqatigiinnerup isumagineqarnerani Aningaasaqarnermut Naligiissitaanermullu Naalakkersuisoqarfik qitiusumik inissisimavoq. Illassutitut aningaasaliissuteqarnissamik qinnuteqaatinik suliarinnittarnermi ilitersuummik suliaqartoqarnissaa pisariaqartinneqannginnersoq Naalakkersuisunit akineqassasoq ataatsimiititaliamit kissaatigineqarpoq. Matumani missingersuusiornermut inatsimmi 2016-meersumi § 19 ataatsimiititaliamit innersuunneqassaaq, taanna malillugu Naalakkersuisut ilassutitut aningaasaliissuteqarnissamik qinnuteqaatit pillugit aalajangersakkanik

erseqqinnerusunik aalajangersaasinnaapput. Tamatumani qitiutinneqartariaqarpoq suliassat Inatsisartunut tunniunneqannginneranni pisortat ingerlatsineranni suliamik ingerlatsisarneq.


Siuliani allassimasunut Naalakkersuisut oqaaseqaateqarnissaat ataatsimiititaliamit qilanaarineqarpoq.

Aningaasaqarnermut Ataatsimiititaliap aalajangenera

Siuliani allassimasutut oqaaseqaateqarluni Naalakkersuisut inassuteqaataat

Aningaasaqarnermut Akileraartarnermullu ataatsimiititaliamit **akuerineqarput.**

Inussiarnersumik inuulluaqqusillunga



Hans Peter Poulsen

Aningaasaqarnermut Akileraartarnermullu Ataatsimiititaliap siulittaasua